

# Montouto, epicentro do minibasquet galego

Tal e como estaba previsto, o Colexio M. P. acolleu o pasado domingo 17 de marzo a primeira Xornada do Minibasquet Galego, que nace con vocación de continuidade. Ao longo de 12 horas ininterrompidas, as instalacións colexiais e deportivas congregaron a máis de 500 persoas.

## 1

### A chegada

#### Os adestramentos de tecnificación

.....

Ás 9 da mañá abríanse as portas de acceso para os responsables da Fegaba encabezados polo seu director técnico, Carlos Colinas. Con el os diferentes adestradores e persoal auxiliar da propia federación. Con eles, comezaron a chegar os pais máis madrugadores. En cuestión dunha hora, o aparcadoiro estaba acugulado e na Residencia colexial unha fileira de pais cos seus nenos esperaban para pasar control de datos e gozar dun pequenos refrixerio ofrecido polo Centro como sinal de benvinda.

Transcorrido este primeiro acto rutinario, os verdadeiros protagonistas foron dirixidos por idades e sexos cos responsables de tecnificación, concentrándose os do ano 2002 nos seus lugares de adestramento ás 10.00, os de 2003 ás 11.15 e os de 2004 ás 12. 30. En total, 150 nenos (25 por ano e sexo) viviron unha xornada intensa e práctica de adestramentos acompañados por un día espléndido.

## 2

### Charla-coloquio

.....

Mentres tanto, e tal como estaba previsto, a media mañá os pais foron dirixidos ao salón de actos, onde asistiron a unha interesantísima e gratificante charla-coloquio na que actuou como moderador Rubén Domínguez, psicólogo e adestrador de baloncesto, e na que participaron Leticia Fernández, responsable da Área de Saúde da Fegaba, José A. Godoy, árbitro e membro do CGAB, e mais Belén Iglesias e Ricardo Aldrey, ex xogadores profesionais de baloncesto e pais de practicantes deste deporte.

Non quedou ningún dos 398 asentos do salón libres e moitos dos pais tiveron que seguir as dúas horas de charla de pé. O interese da mesma, a comodidade do propio salón e a preocupación polos fillos fixo que ese tempo subese a pouco.

### 3

#### A visita dos xogadores do Obradoiro

.....

Todos os nenos, unha vez que remataron os seus adestramentos, foron atendidos por monitores de tempo libre en distintas dependencias colexiais e cando todos remataron, sobre as 13.30 h., concentráronse no pavillón novo para vivir emocionados a visita dos xogadores da ACB Rafa Luz e Micky Stobart.

Rematada a súa visita, triple de Rafa e mate de Miki incluídos, partiron cos seus pais para os seus lugares de orixe, pensando seguramente se haberá unha segunda oportunidade para vivir este deporte como diversión única e exclusivamente.

### 4

#### A comida

##### Mesa redonda

.....

Os membros da organización, os anfitrións, os adestradores presentes e os xogadores das dúas seleccións tiñan xornada de tarde, pero antes había que repoñer forzas. O comedor colexial acolleu aos 110 comensais que aínda tiñan actividade vespertina. Repuxeron forzas, degustaron o menú que se lles ofreceu e preparáronse para vivir unha intensa tarde.

A tarde traía como primeiro prato un Foro de debate sobre as posibles melloras do minibasket galego dirixido aos adestradores, responsables de clubs e persoas interesadas. Coa participación dunhas cen persoas, exercendo Carlos Colinas de moderador, deron pé ao coloquio Francisco Martín, presidente da Fegaba, Juan Carlos Castro, director técnico de CB Breogán, e José Luis Guede, adestrador superior.

### 5

#### Partidos amigables

##### Aula formativa

.....

Mentres se desenvolvía o Foro, que se prolongou ata pasadas as 17 h., facían o seu queceamento repartido os integrantes da selección galega feminina, que terían como rival unha selección de xogadoras infantís do Colexio. O de menos foi o resultado (22-61 para a selección galega). O máis importante, a experiencia vivida. Rematado este, tocoulle a vez á selección masculina. Aquí o resultado foi menos avultado (42-62 para a selección galega), pero a intensidade e a ilusión, as mesmas.

Case ao mesmo tempo, e sen solución de continuidade dadas as posibilidades que as instalacións deportivas de Montouto ofrecen, principiou ás 18.30 unha charla formativa no pavillón novo, a cargo de Darío Méndez.

Rematada a charla tocou a despedida. Recoller todo e emprender o camiño de volta. Na mente de todos quedou unha sensación: Ata o ano que vén!